

水經注釋

ル 5

141

1



只
139
21

東京堂
圖書

斯鏡文
有物那

地經釋
)(卷

明治五年一月八日
紙均
藤野

門 5
號 141
卷 1

光緒六年八月
會稽章氏重刊

水經釋地目

卷一

河水

卷二

渠水

汭水

睢水

汾水

文水

同過水

潞水

潞水

潞水

潞水

陰溝水

獲水

瓠子河

晉水

原公水

滄水

水經釋地目

涑水

湛水

沁水

清水

卷三

渭水

漆水

沮水

澆水

洛水

穀水

澗水

灋水

甘水

伊水

淇水

蕩水

洹水

濁漳水

清漳水

滹水

易水

巨馬河

聖水

灋水

濕餘水

沽河

鮑邱水

濡水

大遼水

小遼水

淇水

卷四

濟水

汶水

淄水

巨洋水

濰水

膠水

洙水

沐水

卷五

淮水

澧水

瀨水

潁水

淇水

東汶水

泗水

沂水

汝水

灋水

濯水

潁水

洧水

卷六

潛水

泚水

肥水

江水

夏水

澠水

潛水

涪水

南沮水

決水

泄水

施水

夷水

溷水

漾水

羌水

梓潼水

漳水

沔水

涪水

均水

丹水

粉水

清水

湍水

比水

白水

蘄水

卷七

沫水

青衣水

若水

淹水

油水

澧水

沅水

延江水

卷八

資水

湘水

鍾水

深水

耒水

洙水

漉水

漣水

瀏水

澗水

廬江水

贛水

漸江水

桓水

葉榆河

溫水

存水

浪水

灑水

滙水

漆水

斤員水

禹貢山水澤地所在

水經釋地卷一

河水

曲阜 孔繼涵 誦孟

崑崙墟在西北去嵩高五萬里地之中也其高萬一千里
河水出其東北陬

戴氏水地記曰河源以南唐吐蕃今西藏之境古崑崙
國在焉積石以東北今青海之境古析支在焉而漢通
大宛西域踰蔥嶺而西古渠搜在焉三地大小諸國通
稱西戎繫於雍州

屈從其東南流入於渤海又出海外南至積石山下有石

酈注云余考羣書咸言河出崑崙重源潛發淪於蒲昌
 出於海水逕積石而為中國河而經文在此似為不比
 積石宜在蒲昌海下矣戴氏東原曰道元以蔥嶺于闐
 之河入蒲昌海潛行地中復出為積石河蔥嶺在今回
 部葉爾羌西于闐即和闐在葉爾羌東南蒲昌海即羅
 布淖爾在闐展西南積石山在青海境積石之西五六
 百里即星宿海今呼鄂敦塔拉朱思本所謂水從地湧
 出如井其井百餘者也道元言河之所潛出于積石宜
 即指星宿海水地記曰禹貢之積石值西甯邊外西南

五百餘里漢志金城郡河關積石山在西南羌中是也
 河關故縣在今西甯府西南邊外番語謂祖阿木尼謂
 色班駁瑪勒占謂冰木遜故呼積石山曰阿木尼瑪勒
 占木遜其山有九峰縣亘三百餘里河行山南繞東麓
 轉西即梁寅河源記所言河繞山之三面如玦然其西
 南山值河之東曰哈爾吉東有山二峯高峻曰阿木尼
 穀懇古爾板凡曰阿木尼者皆番人所望祭大山河西轉之左曰烏藍芒
 奈有嶺北枕河曰哈爾吉盛夏積雪多瘴氣元史地里
 志都實言甘思東北有大雪山名亦耳麻不莫刺其山
 最高譯言騰乞里塔番語謂天騰乞里日塔者言平坦處即崑崙也山腹

至頂皆雪冬夏不消元史云崑崙者誤水經注唐述山
隨唐間始有小積石之目魏王泰括地志云大積石山
在吐谷渾界小積石山在抱罕縣西北縣今河州元和郡縣
圖志鄯州龍支縣在今西甯府積石山在縣西九十八
里河州枹罕縣積石山在縣西北七十里又云四瀆之
中河源最高從高注下其流峻急禹貢導河積石至于
龍門又曰導洛自熊耳按洛水出上洛西山經熊耳之
北所言導者皆謂紀所施功不必自其源也則吉甫直
以小積石當禹貢之積石而爲之說此山在酈道元注
水經時尙不名小積石而太子賢注後漢書杜佑作通

典乃與李吉甫同誤後儒以之解經至元人遂誤以大
積石爲崑崙矣戴氏東原又曰案此下原本及近刻有
河水冒以西南流七字考山海經云積石之山下有石
門河水冒以西南流即今河行積石山南遠其東折而西
流逕山北然後轉東北流形勢適合石門當在折西之
處不得云西南流也作水經者誤以爲河自石門潛行
地中而入蔥嶺然後復出故不取冒以西南流之語下言
入蔥嶺則上不得言其流當是後人見山海經河水冒
以西南流句與下有石門相連遂掇其語于此又因下文
言南入蔥嶺更臆改西流爲西南流耳杜佑通典兩引

水經南至積石山下有石門即接以又南入蔥嶺山又從蔥嶺出而東北流絕不及河水冒以西南流七字其為唐時本所無甚明今據通典訂正刪去七字

又南入蔥嶺山又從蔥嶺出而東北流

戴氏案原脫此九字杜佑通典引水經有此文蓋唐已後始脫去今補正

其一源出于闐國南山北流與蔥嶺所出河合

戴氏云近脫所出二字據通典補

又東注蒲昌海

戴氏案近脫又字據通典補

又東入塞過敦煌酒泉張掖郡南

漢武帝元鼎六年分酒泉郡立敦煌郡隸涼州晉元康五年分五縣又分酒泉之沙頭又別立會稽新鄉二縣為晉昌郡北魏以郡立瓜州又立效穀壽皇會稽常樂伊吾郡隋廢唐貞觀七年改沙州又立瓜州伊州西州庭州元為沙州路領瓜州玉門關在西北十八里明洪武初置沙州衛在肅州衛西八百里永樂二年置哈密衛 酒泉郡漢武帝元狩二年置隸涼州晉永嘉以後前涼張氏分為建康郡隋仁壽中置肅州北魏分為玉門郡唐隸隴右道嗣聖初又分立建康軍元曰肅州路

明洪武初置肅州衛隸陝西行省司甘州西歷高臺所
鎮夷所皆其地也 張掖郡漢武帝元鼎六年分武成
置隸涼州後漢獻帝分立西郡北魏分立番禾郡唐曰
甘州元至元元年甘州路總管府明洪武二十八年建
甘州衛山丹衛

又東過隴西河關縣北洮水從東南來注之

漢地理志河關屬金城郡下云積石山在西南羌中河
水行塞外東北入塞內至章武入海過郡十六行九千
四百里按金城郡昭帝始元六年取天水隴西張掖各
二縣置領縣十三而天水郡又元鼎六年分隴西立後

漢隸隴西郡陳芳績曰周隋洮河郡之河津疑即漢之
河關縣也

又南過金城允吾縣北

漢地理志烏亭逆水出參街谷東至枝陽入湟三國已
後無明在蘭州西南五十里自皋蘭金城關而西肇沙
井至莊浪為允吾地

又南過榆中縣北

至隋廢明在蘭州西二百里通典曰故城在今五泉縣
東 又似在蘭州東

又東過天水北界

漢武帝元鼎三年分隴西立後漢明帝十七年改漢陽郡晉仍為天水唐徙成紀曰秦州元隸鞏昌路明屬鞏昌府

又東北過武威媼圍縣南

三國省明永昌衛

又東北過天水勇士縣北

三國省明在靖虜衛西南二百里

又東北過安定北界麥田山

又北過北地富平縣西

漢高帝析靈州迴樂縣置晉移治左馮翊懷德縣周保

定二年置會州建德二年立鳴沙鎮隋曰鳴沙金廢明

在甯夏衛東南一百五十里今在甯夏府

又北過朔方臨戎縣西屈從縣北東流

漢元狩五年城遼改名富民屬豐州元省入豐州

至河曰縣西屈南

漢屬五原郡

過五原西安陽縣南屈東

徐廣曰陰山在河南陽山在河北

過九原縣南

漢屬五原郡遼曰柔服屬雲內州

又東過臨沃縣南

漢屬五原郡

又東過雲中槓陵縣南

莽曰槓陸上郡有槓林莽曰槓幹後漢省金曰宣平元屬順甯府明洪武四年廢

又東過沙南縣北

漢屬雲中郡按晉雁門郡亦有沙南縣陳氏芳績曰諸志謂懷仁卽漢沙南非也漢雲中郡縣俱在大同府西北數百里外今懷仁在大同府西南七十里大同府卽漢平城其南應州卽漢陰館俱屬雁門郡在漢時雲中

郡之沙南必無遙設於此之理況其中更有定襄郡之隔絕也自建安末雲中郡縣盡棄於戎悉以其流民別置於內地沙南之在雁門境者亦必係此時另置者諸志未考以懷仁爲沙南非也寰宇記云漢沙南地魏晉不立郡邑可証漢地理志雁門郡無沙南

從縣東屈南過沙陵縣西

漢屬雲中郡後無酈注云白渠水西北逕沙陵縣故城南西注沙陵湖湖水西南入於河河水南入槓陵縣西北緣胡山歷沙南縣東北兩山二縣之間而出余以太和中親所逕涉河水南流脈水尋經殊乖川去之次似

非關究也

又南過赤城東

戴東原曰赤城在朔州西北又東赤城見沽水注即萬全指揮司東北二百里之赤城堡魏主登國二年神瑞二年如赤城者也司沽即今宣化府府又有赤城縣

又南過定襄桐過縣西

北齊之紫阿鎮遼會昌中曰宣德屬德州金大定八年更宣甯屬大同府明省在大同府西北八十里

又南過西河圍陽縣東

漢志圍陽唐屬銀州師古今銀州銀水是舊名猶存但

字變耳明葭州

又南過離石縣西

漢屬西河郡獻帝末荒廢為南單于庭左國城

又南過中陽縣西

魏移置茲氏界漢屬西河郡酈注云中陽縣隔越重山不濱於河也

又南過土軍縣西

漢屬西河郡後漢省北魏眞君九年置嶺西後西魏并立吐京郡太和二十一年更名孝昌中陷寄治西河

音訛變陳芳績曰魏收志吐京新城二縣各有三一係

太和二十一年所改是土軍舊地屬汾州吐京郡一係
武定三年置屬武州吐京郡一分屬南汾州南北吐京
郡後吐京石樓是南汾州以北吐京郡屬也新城等縣
是南汾州南吐京郡屬也因魏志無注故後人不詳其
置於土軍孝昌中陷未嘗更有所置此地疑在今綏延
邊外武定所置疑在漢廣武相近隋開皇十八年更名
石樓屬龍泉郡明萬曆九年改屬汾州府陳芳績曰疑
非漢土軍地當是太原郡境

又南過上郡高奴縣東

三國陷於戎北魏太武十二年置廣樂屬夏州金明郡

隋仁壽元年更名金明屬延安郡元曰安塞明屬延安
府

又南過河東北屈縣西

古爲赤狄膚咎如之國後爲晉之屈邑夷吾所居北魏
神麿元年因禽赫連昌於此置禽昌郡眞君二年爲縣
屬平陽郡後廢在今洪洞東南二十四里

又南過皮氏縣西

漢屬河東郡陳芳績曰有龍門山北魏眞君七年更名
龍門屬高梁郡隋屬河東郡唐屬河中府宋宣和改河
津明屬蒲州今隸絳州酈注云皮氏縣故城在龍門東

南不得延逕皮氏方屆龍門也

又南出龍門口汾水從東來注之又南過汾陰縣西古之綸少康邑漢屬河東劉淵省入蒲坂北魏太和十一年復置於后土城屬北鄉郡周武帝又於殷湯古地復置汾陰郡以縣屬之唐開元十年更名寶鼎屬河中府宋真宗祀汾陰更名滎河屬河中府金貞祐三年升滎州元屬河中府明屬蒲州今屬蒲州府

又南過蒲阪縣西

漢屬河東郡隋開皇十六年析蒲阪置河東縣大業省入河東縣明洪武二年省入蒲州在蒲州東五里

又南至華陰縣潼關渭水從西來注之

屬京兆本魏之陰晉秦惠文王五年更曰甯秦漢高帝八年更名華陰後漢改屬弘農郡北魏屬華山郡隋屬京兆郡唐垂拱元年更名仙掌神龍元年復上元二年更曰大陰寶應元年復屬華州今屬同州府陳芳績曰華陰有潼關本名衝關河自龍門南流衝激華山東故以爲名漢末徙函谷關改置建安十六年曹操破馬超於潼關卽此隋大業七年移於南北鎮城間坑獸檻谷去舊關四里餘至唐天授二年移向北近爲路開元十二年於華州岳祠南之通衢立碑御製其文及御書舊

路在岳北因是移於岳南今有潼關廳

又東過河北縣南

漢屬河東郡古魏國晉獻公滅之以封畢萬至曾孫魏莊子徙安邑唐天寶元年因開漕瀆得古刀有平陸字因更名屬陝州金屬解州今仍

又東過陝縣北

漢屬弘農郡明省入陝州今河南陝州

又東過大陽縣南又東過砥柱間

漢屬河東郡北魏屬河北郡後廢

又東過平陰縣北清水從西北來注之

漢屬河南郡在平城南故曰平陰晉曰河陰陳芳績曰未詳何時更名仍屬河南郡魏書云河陰晉置開封府志云秦置平陰縣在廣武山漢徙置頓河山下名曰河陰晉改曰平陰屬河南尹與漢晉志皆謬北魏太宗省入洛陽正始二年復置於皇女臺側仍屬河南郡隋開皇二年遷嚴明城大業元年省入洛陽開元二十二年復遼會昌二年改屬孟州金改屬鄭州明遷治鄭州西北五十里仍屬鄭州酈注云河水又東逕平陰縣北右會濬水經書清水非也是乃濬水耳震按注敘清水教水畛水正回之水庸庸之水入河後河方東逕平陰不

得以清水繫之過平陰下如經所次則濬水非清水

又東至鄧

漢屬荊州南陽郡晉屬義陽今屬南陽府

又東過平縣北湛水從北來注之

漢河南郡後漢河南尹在偃師西北二十五里戴氏云近訛作平陰考上言過平陰清水來注此不得復言過得平陰湛水來注明矣後人習見平陰罕見平因而妄加然湛水入河在鄧不在平縣故城之東道元于河水逕平縣故城北下卽云又東溴水入焉于湛水云斯乃溴水之所由非湛水之間關也可證此本作平縣

又東過鞏縣北洛水從縣西北流注之

古鞏伯國漢屬河南郡與成皋中分洛水西則鞏東則成皋後魏併焉北魏天平初分屬成皋郡後廢隋開皇十六年復治洛口屬河南郡今屬河南府有洛口驛

又東過成皋縣北濟水從北來注之

漢屬河南郡故虎牢或曰北制或曰東虢皆是此宋武帝得之改屬滎陽景平初失魏有之仍屬滎陽隋開皇十八年更名汜水唐初屬鄭州顯慶二年改屬洛州垂拱四年改曰廣武神龍元年復後改屬孟州今屬開封府

又東過滎陽縣北蕩蕩渠出焉

秦置縣三川郡曾自洛陽移治焉漢屬河南郡卽鴻溝志云卞水馮池皆在西南有蕩蕩渠首受沛東南至陳入潁宋武帝時有之景平初失北魏大中移治大索城仍爲滎陽郡治卽鄭子皮勞諸索氏之地今屬開封府又東北過武德縣東沁水從西北來注之

秦始皇東巡置漢屬河內郡有安昌城成帝封張禹於此隋開皇二年改曰邢邱大業二年更名安昌唐武德四年復并置北義州四年州廢屬懷州宋熙甯二年省入河內在懷慶府東南六十里

又東北過黎陽縣南

漢屬魏郡陳芳績曰黎山在其南河水經其東有白馬津大伾山在縣南七里北魏孝昌中爲黎州及黎陽郡治大業初改屬汲郡金爲濬州治元省入濬州明屬大名府今河南衛輝府濬縣

又東過衛縣南

漢初名畔觀縣屬東郡世祖更名衛晉泰始二年分屬頓邱郡隋開皇六年改名觀城屬武陽郡唐貞觀十七年省入昌樂臨黃大曆七年復屬澶州宋皇祐元年省四年復屬開德府元改屬濮州今屬曹州府酈注云河

水東北流而逕濮陽縣北為濮陽津故城在南與衛縣
分水城北十里有瓠河口河水又東北逕衛國縣南東
為郭口津

又東北過濮陽縣北瓠子河出焉

漢屬東郡應劭曰濮水南入鉅野北魏屬濮陽郡唐屬
濮州明省入開州

又東北過東阿縣北

漢屬東郡後漢析置穀城北齊省穀城入東阿唐武德
四年屬濟州後改屬鄆州宋開寶二年遷治於南谷鎮
太平興國二年又遷於利仁鎮紹興二年又遷於新橋

鎮元復遷治於利仁鎮屬東平路明洪武八年遷治穀
城屬東平州

又東北過荏平縣西

漢屬東郡永光元年改屬濟北國三國魏改屬平原郡
北齊省隋開皇初復屬清河郡唐貞觀元年省入聊城
金復屬博州元屬東昌路

又東北過高唐縣東

左氏襄十九年夙沙衛奔高唐以叛漢屬平原郡北魏
省景明三年復南清河郡治唐屬博州元至元二年立
為州鄆注云大河東逕高唐縣故城西大河逕其西而

水經釋地卷一
不逕其東經言出東誤耳

又東北過楊虛縣東

漢屬平原郡戴氏案地理志功臣表作樓虛王子侯表作楊虛則樓字訛後漢省鄆注云楊虛城在高唐城之西南經次於此是不比也

商河出焉

商音的今商河縣屬武定府本枋縣地隋開皇十六年更名滴河縣因河爲名

又東北過濕陰縣北

漢屬平原郡志作濕曰濕水出東城武陽東北入海師

古曰音佗合反晉有濕沃屬樂陵國

又東北過利縣北

戴云利縣今訛作黎城縣考濟水章經云東北過利縣西又東北過甲下邑入于河可證此文

又東北過甲下邑濟水從西來注之又東北入于海

漢屬齊郡後漢屬千乘郡鄆注云河水枝津東逕甲下城南東南歷馬常坑注濟經言濟水注河非也河水自枝津東北流逕甲下邑北又東北流入于海

水經釋地卷一終

海甯錢保塘
華陽吳祖椿覆校

水經釋地卷二

曲阜 孔繼涵 誦孟

渠水

渠出滎陽北河東南過中牟縣之北

漢屬河南郡志曰圃田澤在西晉泰始二年分屬滎陽郡北魏眞君八年省入陽武景明元年復北齊保定五年移中牟於圃田城隋開皇十六年復更名內牟大業二年復移治中牟更名圃田唐武德三年復名爲牟州治四年并屬管州貞觀元年改屬汴州龍朔二年復屬鄰州梁改屬開封府

水經釋地卷二
又東至浚儀縣

漢屬陳留郡志曰睢水首受菴蕩渠東至取慮入泗取慮師古音秋盧漢武帝元年廢新里城而立之宋別置於城父此地入魏隋并屬滎陽郡唐武德四年爲汴州治梁開封府治宋眞宗景德間因天書更名祥符金南京路元仍爲汴梁路明開封府

又屈南至扶溝縣北

漢屬淮陽國後漢屬陳留郡北魏屬許昌郡隋末移治桐邱城唐屬許州梁屬開封府酈注云沙水南逕扶溝縣故城東又南逕小扶城西而東南流又東南逕大扶

城西過水於是分焉不得在扶溝北便分爲二水也
其一者東南過陳縣北

秦屬潁州郡漢屬淮陽國晉武帝并屬梁國惠帝復爲陳郡治北魏改名項屬陳郡隋開皇更名宛邱爲陳州治明省入陳州

又東南至汝南新陽縣北

三國以後無志曰在新水之陽

又東南過山桑縣北

漢屬沛郡後漢屬汝南三國屬譙北魏文帝改曰渦陽并立渦州南譙郡於此隋開皇十六年改曰肥水唐天

寶元年遷治更名蒙城屬亳州金屬壽州在今蒙城
口三十六里在安徽省潁州府酈注云山桑故城在過
水北沙水不得逕其北明矣經言過北誤也

又東南過龍亢縣南

漢屬沛郡晉屬譙郡宋僑立於淮南北魏屬下蔡郡隋
開皇六年省入蘄唐武德四年復貞觀八年省在今安
徽省廬州府懷遠縣西北八十里河南歸德府商邱縣
亦有

又東南過義成縣西南入于淮

漢屬沛郡後漢屬九江郡北齊省入臨淮在今安徽潁

州府霍邱縣北四十里

陰溝水

出河南陽武縣蒗蕩渠

古棣城晉泰始二年分屬滎陽郡北魏改屬東弘農郡
北齊天保七年移治汴水南隋開皇五年復唐武德四
年遷治原武城明屬河南開封府在今陽武東南二十
八里

東南至沛爲過水

春秋偃陽國秦屬泗水郡漢屬沛郡後漢屬沛國北齊
省隋開皇十六年復屬彭城郡金初屬滕州後省入源

州元復至元二年省入豐三年復屬濟州八年隸濟甯路明屬徐州今屬江蘇徐州府酈注云過水受沙水於扶溝縣不得至沛方為過水也

又東南至下邳淮陵縣入于淮

漢屬臨淮郡永平十五年更臨淮為下邳國晉元康七年為臨淮郡治陳芳績曰宋地志淮陰縣惠帝永甯元年以為淮陵國其頭領縣無淮陵疑宋以僑置司吾徐陽樂三縣中都志云後縣廢在舊招信縣西二十五里

汧水

汧水出陰溝於浚儀縣北又東至梁郡蒙縣為獲水

兩漢俱屬梁郡宋屬譙郡齊屬梁郡梁立蒙郡隋開皇省入壽春通鑑注併入山桑宋寰宇記併入睢陽戴氏云獲水近刻訛睢水考後獲水出汧水于梁郡蒙縣北而睢水出梁郡鄆縣可證此乃獲水甚明

餘波南入睢陽城中

古關伯居商邱漢屬梁國宋大明六年改曰壽春隋開皇十八年更名宋城唐屬宋州宋屬應天府金承安五年復名睢陽元屬歸德府治明洪武初省入州嘉靖二十四年復改曰商邱屬歸德府

獲水

獲水出坂水於梁郡蒙縣北又東過蕭縣南睢水北流注

漢屬沛郡隋屬彭城郡元隸徐州明萬曆五年以水遷

於三台山之南麓去舊縣南十里在今縣北十里鸚哥

香山二山之間酈注云箕谷水北流注獲余嘗逕蕭邑

城右唯是水北注獲水更無別水疑即經所謂睢水也

又東至彭城縣北東入於泗

秦屬泗水郡高帝六年改爲楚國治元至元二年省入

徐州

睢水

睢水出梁郡鄆縣東

漢屬陳留郡後漢改屬梁國酈注云睢水出陳留縣西

浪蕩渠經言出鄆非矣

過睢陽縣南又東過相縣南

漢屬沛郡徐州志云魏明帝景初二年改屬汝陰郡北

齊省在今宿州西北九十里

屈從城北東流當蕭縣南入於陂

酈注云睢水逕下相縣故城南東南流入於泗謂之睢

口經止蕭縣非也戴氏云入陂近誤作入睢考睢水與

梧桐陂水互相通注故經敘睢水言入于陂今改正

瓠子河

瓠子河出東郡濮陽縣北河東至濟陰句陽縣為新溝

晉末無在今曹縣北三十里

又東北過廩丘縣為濮水

漢屬東郡後漢永光二年屬濟北國晉屬濮陽國隋大

業初省入鄆城

又北過東郡范縣

古顧國詩韋顧既伐後漢屬東平國北齊省隋開皇十

六年復屬濟北郡唐貞觀八年屬濮州今屬曹州府

東北為濟渠與將渠合又東北過東阿縣東又東北過臨

邑縣西

漢屬東郡後漢永光二年分屬濟北國隋屬齊郡唐屬

齊州宋建隆三年以河決壞城徙治孫耿鎮屬濟南府

元太宗七年改屬河間府明洪武初屬濟南府故城在

今縣北二十里

又東北過荏平縣東為鄧里渠又東北過祝阿縣為濟渠

漢屬平原郡晉屬濟南郡宋屬太原郡隋屬齊郡唐天

寶元年更名禹城乾元二年遷治於遷美鄉元屬曹州

明屬濟南府故城在禹城南八十里

又東北至梁鄒縣西分為二

秦屬齊郡漢分屬濟南宋置東平原郡於此北齊天保七年移平原縣治此隋開皇又移平原縣於鄒平此廢金為齊東鎮元為齊東縣屬河間府明屬濟南府其東北者為濟河其東者為時水又東北至濟西濟河東北入於海

酈注云脈水尋梁駟濟無二流蓋經之誤

時水東至臨淄縣西

漢屬齊郡北齊天保七年省入益都隋開皇十六年復屬北海郡元屬益都路明屬青州府酈注云時水自西安城西南枝津別出西北至梁鄒城入於濟蓋時來注

濟若濟分東流明不得以時為名尋時濟更無別流南延華費之所斯為謬矣

屈南過泰山華縣東

晉屬琅琊郡

又南至費縣東入於沂

漢屬東海郡後漢屬泰山郡晉屬琅琊郡宋移枋城北魏太和二十年又徙治北陽山口隋開皇三年復徙枋城宋屬沂州明洪武元年屬濟甯府五年改屬濟南府十八年改屬兗州隨州遷轉

汾水

汾水出太原汾陽縣北管涔山

後漢省入九原晉屬河東郡北魏分三縣屬龍門郡隋
分爲五縣屬太原府唐分併遷移遂省故城在今太原
府西七十里戴氏曰管涔山在今甯武縣西六十里

東南過晉陽縣東

堯都漢屬太原郡北齊河清四年移晉陽於汾水東而
於城中置龍山縣城中者附郭也隋開皇十年省龍山復徙晉
陽於城中又於汾水東置太原郡大業中又遷入城中
唐貞觀復徙太原郡於汾水東而此爲晉陽縣宋初以
縣爲平晉軍尋復爲縣後又徙治永利監明洪武八年

遷平晉縣於汾水西漢縣基更爲太原縣屬太原府而
以陽曲縣爲府治

晉水從縣南東流注之又南同過水從東來注之又南過
大陵縣東

晉平陵地趙名大陵武靈王遊大陵秦屬太原郡北郡
省真君九年於大陵城西南十里置受陽隋開皇十年
更名文水屬太原郡宋元豐間徙治漳沱村今故城在
文水東北二十里

又南過平陶縣東

漢屬太原郡北魏以太武名燾更名平遙後以西羌內

浸遷

文水從西來注之又南過冠爵津又南入河東界又南過永安縣西

故霍伯國漢菟縣屬河東郡後漢順帝元嘉三年改名永安魏分屬平陽北魏真君七年省入禽昌正始二年復為永安郡治隋開皇十八年更名霍邑屬臨汾郡唐武德元年為呂州治貞觀十七年并屬晉州金為霍州治明併入霍州

歷唐城東

前志太原郡晉陽下故詩唐國臣瓚曰所謂唐今河東

永安是也河東郡平陽下應邵曰堯都也在平河之陽後志晉陽下詩譜曰堯始都於此後遷河東平陽下堯都此注晉地道曰有堯城

又南過楊縣東

漢屬河東郡晉省北魏太和二十一年復屬永安郡隋屬臨汾郡義甯二年更名洪洞遷治唐屬晉州宋屬平陽府故城在縣東南十八里

西南過高梁邑西

楊有高梁亭左氏僖九年殺懷公於高梁

又南過平陽縣東

漢屬河東郡三國分爲平陽郡治北魏眞君六年省入禽昌太和十一年復隋開皇元年改曰平河三年又更曰臨汾宋平陽府治

又南過臨汾縣東

漢屬河東郡北魏眞君七年省入泰平太和十一年復屬平陽郡北齊省隋開皇三年復十八年遷更名正平爲絳州治明省入絳州故城在絳州東北二十五里又屈從縣南西流又西過長修縣南

漢屬河東郡後漢省

又西過皮氏縣南又西至汾陰縣北西注於河

晉水

晉水出晉陽縣西縣雍山

戴氏曰今太原縣西南十里

東過其縣南又東入於汾水

文水

文水出大陵縣西山文谷

戴氏曰出今交城縣西山文谷在文水縣北二十里

東到其縣屈南到平陶縣東北東入於汾

原公水

原公水出茲氏縣西羊頭山

漢太原郡魏黃初三年立西河郡於此晉曰隰城唐上元元年更名西河汾州治明洪武初省入汾州萬曆九年復更名汾陽為附郭戴氏曰出今汾陽縣西北二十五里白彪山

東過其縣北又東入於汾

酈注云水注文湖不注汾也

同過水

同過水出沾縣北山

漢屬上黨郡北魏眞君九年改屬太原郡後省北齊移樂平郡治此隋為樂平縣元屬平定州戴氏曰出今樂

平縣西三十餘里隄泉嶺之西魏書地形志作同過云五水合道故曰同過

西過榆次縣南

春秋魏榆地漢屬太原郡

又西到晉陽縣南西入於汾

澮水

澮水出河東絳縣東澮交東高山

漢屬河東郡後漢曰絳邑北魏太和十二年遷置為北絳又置南絳為漢聞喜地屬正平郡隋開皇十八年更名翼城屬絳州唐武德元年立澮州四年復屬絳州明

九經釋地卷二
洪武二年改屬平陽府其南絳隋恭帝去南字唐武德元年自車箱城移於澮州今絳縣也漢絳縣在今曲沃南二里戴氏曰水出今翼城縣東南十五里翔高山西過其縣南又西南過虎祁宮南又西至王澤注於汾水

涑水

涑水出河東聞喜縣東山黍葭谷

戴氏云出今絳縣南四十里橫嶺山

西過周陽邑南又西南過左邑縣南

漢屬河東郡後漢省移聞喜治此北魏太和十一年分屬正平郡周武帝移治柏壁隋開皇三年併屬絳州十

年復移於甘谷口元和十年復歸桐鄉後無在今絳州

西南二十里

又西南過安邑縣西

漢河東郡治北魏更名北安邑太和十一年屬河北郡隋開皇十六年爲虞州治義甯元年復唐武德二年爲虞州治大曆復宋屬解州

又南過解縣東

漢屬河東郡北魏更曰南解西魏改曰綏化又曰虞鄉大業九年自綏化移治宋屬解州明洪武初省入州又西南注於張陽池

湛水

湛水出河內軹縣西北山

隋開皇十六年析軹縣之北置濟源縣大業二年省軹入河內明洪武十年改濟源屬懷慶府故城在濟源南

十三里

東過其縣北又東過波縣之北

波屬河內郡三國無

又東過毋辟邑南又東南當平縣之東北南入於河

酈注云過毋辟邑南句原經所注斯乃渙川之所由非湛水之間關也是經之誤證耳

水經釋

坤川卷

光緒六年八月
會稽章氏重刊

沁水

沁水出上黨潞縣謁戾山

晉析涅置武鄉縣北魏永安中更名陽城屬鄉郡隋開
皇十八年改曰甲水大業初省入銅鞮故城在遼州北
三里戴氏云出今沁源縣北

南過潞遠縣東

漢屬上黨郡三國無北魏建義元年置更曰沁源爲義
甯郡治唐屬沁州明屬沁州

又南過隋氏縣東

屬上黨郡晉省北魏景明元年復曰寄氏隋開皇九年

移治長子寔字記云在冀州北三十五里猗當作隋此
非河東之猗氏也

又南過陽阿縣東

漢屬上黨郡晉以陽阿改置轅陽縣在涅縣地屬樂平
郡北魏復屬高都郡隋省入遼陽開皇十一年更名遼
山屬太原郡明省遼山入遼州

又南出山過沁水縣北

漢屬河內郡北齊省入軹濟源縣志故城在濟源東北
沁水南沁臺西今呼王塞城沁水縣志云在沁水西三
十里今名故城村

又東過野王縣北

漢屬河內郡隋開皇十六年更名河內

又東過州縣北

漢屬河內郡北魏屬武德郡隋無

又東過懷縣之北

漢屬河內郡隋開皇十六年析修武縣置武陟大業初
省懷入安昌唐武德二年復屬陟州貞觀元年省入武
陟四年屬懷州明屬懷慶府

又東過武德縣南又東南至滎陽縣東入于河

清水

水經釋地卷二
清水出河內修武縣之北黑山

商甯邑晉南陽秦屬河內郡晉屬汲郡魏曰南修武隋
大業十年遷於永橋又遷於濁鹿武德四年徙復舊治
明屬懷慶府

東北過獲嘉縣北

漢武帝元鼎六年因獲呂嘉因汲之新中鄉置屬河內
郡晉屬汲郡北齊移治共城隋開皇初自共城移治於
此唐武德四年爲殷州治宋天聖四年改屬衛州明屬
衛輝府故城在新鄉西南二十三里
又東過汲縣北

漢屬河內郡魏屬朝歌晉泰始二年爲汲郡治魏興和
二年爲義州治周改曰伍城屬衛州隋開皇六年復故
名屬汲郡唐武德元年爲義州治明衛輝府治

水經釋地卷三

水經釋地卷二終

海甯錢保塘
華陽吳祖椿覆校

水經釋地卷三

曲阜 孔繼涵 誦孟

渭水

渭水出隴西首陽縣渭谷亭南烏鼠山

漢屬隴西郡北魏分置渭源縣唐高宗儀鳳三年省入

渭源宋屬臨洮府元屬臨洮路明屬臨洮府

東北過襄武縣北

漢屬隴西郡唐人吐蕃在今鞏昌府東五里近訛作又

北戴氏曰注云渭水常若東南不東北也可證又字乃

東字之訛

水經釋地卷三

又東過獮道縣南

漢屬天水郡三國南安郡治宋更名桓道唐入吐蕃在今鞏昌府東二十五里

又東過冀縣北

漢屬天水郡晉泰始五年爲秦州治北魏更名當亭隋更名冀城屬天水郡唐武德二年更名伏羌并爲伏州治元屬鞏昌府

又東過上邽縣

漢屬隴西郡後漢屬漢陽郡晉屬天水郡北魏以犯諱改曰上封後唐破蜀移清水縣之宋屬秦州

又東過陳倉縣西

秦屬內史漢屬右扶風獻帝中平六年分屬漢安郡隋屬岐州大業十年移於渭水北留谷城唐至德二載更名寶雞屬鳳翔府

又東過武功縣北

漢屬右扶風在渭水南後漢省入郿縣後漢亦省入郿永平八年於檠故城置武功縣在渭水北非前漢之武功也晉泰始二年分屬始平郡北魏太和十一年更名美陽爲武功郡治周太和四年美陽還舊治建德三年復立武功於中亭川隋屬京兆金屬乾州故檠城在

今武功西南二十二里

又東芒水從南來流注之又東過槐里縣南

漢屬右扶風晉泰始二年爲始平郡治北魏永安元年徙治恭帝元年又徙今興平東北二十里周大象二年又徙今興平東十里文學城隋開皇三年更名始平屬京兆大業九年又徙今治唐景龍四年更名金城徙於馮翊故城至德二載改名興平復於大業故城宋屬京兆故城在興平東北十五里

又東澇水從南來注之又東豐水從南來注之又東過長安縣北

漢屬京兆隋開皇三年以城狹水鹹遷於長壽坊西南隅去漢縣東南十三里今西安府

又東過霸陵縣北

秦芷陽縣漢屬京兆晉更名霸城北周省入萬年在今西安府東二十五里霸水東

霸水從縣西北流注之又東過鄭縣北

漢屬京兆唐華州治元省入華州

又東過華陰縣北東入於河

戴云長安故城在今長安縣西北霸陵故城在今咸甯縣東鄭縣故城在今華州北而華陰又在其東渭水西

來由長安霸陵鄭縣乃至華陰入河大典本經文於長
安之後次華陰次鄭縣次霸陵接以東入於河近刻多
從朱謀埠本長安之後次鄭縣次華陰次霸陵皆失之
注內訛舛尤甚其所敘成國等渠散在數處漫無首尾
紛糾難理今悉以地之方向比次推勘爲之是正又按
注故渠又東逕漢丞相周勃冢南至東南流注於渭水
一段原本近刻竝訛在白渠首起谷口尾入櫟陽是也
今無水下考其文義仍敘成國故渠其入渭在景陵之
東南渠自西而東逕漢諸陵先武帝茂陵次昭帝平陵
次成帝延陵次元帝渭陵次哀帝義陵次惠帝安陵次

高帝長陵次景帝陽陵據三輔黃圖所記茂陵在長安
城西北八十里平陵在長安城西北七十里延陵在扶
風去長安六十二里渭陵在長安北五十六里義陵在
扶風渭城西北原上去長安四十六里安陵在長安城
北三十五里去長陵十里長陵亦去長安城三十五里
陽陵在長安城東北四十五里注文前後錯紊數處其
脈絡條貫可尋又以三輔黃圖諸陵里數參之無不脗
合

漆水

漆水出扶風杜陽縣俞山東北入於渭

漢屬扶風中平二年屬漢安郡晉省隋義甯二年遷置麟遊縣屬麟遊郡唐屬鳳翔府故城在今府北九十里

沮水

沮水出北地直路縣

後漢省

東過馮翊殺初縣東入於洛

魏文帝移郡治更縣名泥陽隋開皇六年更名華原屬宜州唐垂拱元年更名永安後復元至元元年省入耀州陳芳績曰殺初故城在耀州東北一里隋華原故城在耀州北三里永安故城在三原縣界即初置北雍州

者俱未詳何時變遷

澹水

澹水出京兆藍田谷北入於灞

洛水

洛水出京兆上洛縣謹舉山

漢屬弘農後漢屬京兆晉泰始二年為上洛郡治唐為

商州今陝西商州

東北過盧氏縣南

縣屬弘農郡晉屬上洛郡隋屬弘農郡唐屬虢州元屬

嵩州明屬河南府

水經釋地卷三
又東北過蠡城邑之南又東過陽市邑南又東北過于父
邑之南又東北過宜陽縣南

漢屬弘農郡北魏析置宜陽郡立甘棠四縣隋更甘棠
曰壽安唐武德二年更名福昌爲熊州治後唐更名福
慶宋曰福昌後省入壽安元曰宜安屬河南路明曰宜
陽屬河南府

又東北出散關南又東北過河南縣南

漢屬河南郡東魏屬新安郡隋復金省入洛陽

又東過洛陽縣南伊水從西來注之又東過偃師縣南

漢屬河南郡晉省入候氏北魏復明屬河南府

又東北過鞏縣東又北入于河

穀水

穀水出弘農黽池縣南墦冢林穀陽谷

寰宇記曰魏移於今福昌縣西六十五里蠡城又曰魏
大統十一年復治漢城隋大業元年移於新安驛又遷
大塢城義甯二年分屬宜陽郡唐貞觀元年又遷今治
改名天池屬穀州復名澗池屬河南府故城在今縣西
十三里新安驛在縣東二十五里大塢城在縣

東北過穀城縣北

漢屬河南郡晉省入河南故城在河南府西北俗謂之

嚴城因北齊嚴略增築也師古曰卽今新安後漢析東阿置穀城在東郡非此

又東過河南縣東南入于洛

澗水

澗水出新安縣南白石山東南入於洛

漢屬弘農郡晉屬河南郡唐初為穀州後屬河南郡

灑水

灑水出河南穀城縣北山東與千金渠合又東過洛陽縣南

漢河南郡治北魏屬洛陽郡陳芳績曰隋大業元年徙

治於道光坊灑水西於是去成周而入王城矣唐天授三年析洛陽置來庭縣在故洛陽從善坊今洛陽乃漢

河南縣也

又東過偃師縣又東入於洛

甘水

甘水出弘農宜陽縣鹿蹄山東北至河南縣南北入於洛

伊水

伊水出南陽魯陽縣西蔓渠山

北魏太和十一年為魯陽郡治隋末更名魯山屬襄城都唐屬汝州

東北過郭落山又東北過陸渾縣南

漢屬弘農郡晉屬河南郡魏為伊陽郡隋開皇初更名伏流大業初復名屬河南郡唐先天元年析陸渾置伊陽縣五代省入伊陽明屬南陽府伊陽今屬汝州

又東北過新城縣南

古鄆氏漢屬河南郡北魏天平初分立新城郡隋開皇十八年更名伊闕宋紹興九年省入伊陽伊陽今屬汝州

又東北過伊闕中又東北至洛陽縣南北入於洛

淇水

淇水出河內隆慮縣西大號山

後漢避端帝諱更名林慮魏屬朝歌郡晉屬汲郡魏為林慮郡治唐貞觀十二年徙於今治金升林州明為林縣屬彰德府

東過內黃縣南為白溝屈從縣東北與洹水合

漢屬魏郡北魏天平初省入臨漳隋開皇六年復移治屬汲郡唐屬相州宋屬大名府故城在今縣北十九里又東北過館陶縣北

漢屬魏郡魏屬陽平郡石趙移陽平郡治此隋屬武陽郡唐屬魏州宋屬大名府明屬臨清州

水經釋地卷三
又東北過清淵縣西

漢屬魏郡晉更名清泉屬陽平郡後趙改曰臨清北魏復名太和二十一年分立臨清縣隋屬清河郡唐武德五年省入臨清明初屬東昌府後升爲臨清州

又東北過廣宗縣東爲清河

漢堂陽縣屬鉅鹿郡後漢章帝分置廣宗縣經縣晉屬安平郡隋仁壽元年更名宗城屬清河郡宋屬大名府元至元二年省入平鄉尋復置復名屬順德府

又東北過東武城縣西

漢屬清河郡以定襄有武城故加東字晉去東字北齊

天保七年遷治信成隋開皇六年還舊治唐調露元年移於永濟渠北義王橋西二里宋大觀中以衛水患還治於東十里屬恩州元屬高唐州

又北過廣川縣東

漢屬信都國後漢屬清河郡魏省晉復屬勃海郡隋仁壽更名長河周省入棗強故城在棗強東三十里

又東過蓆縣南

漢屬信都國音條後漢屬勃海郡金屬景州明省入景州

又東北過東光縣西

漢屬勃海郡北齊天保七年移治陶氏故城隋開皇三年又遷治魏廢勃海郡唐屬景州明初省旋復屬景州又東北過南皮縣西

漢屬勃海郡唐屬景州元屬河間路明屬滄州

又東北過浮陽縣西

漢屬勃海郡北魏浮陽郡治隋開皇十八年更名清池唐屬滄州故城在今滄州東五十里龍堂前去舊滄州東十里陳芳績曰疑誤

又東北過濊邑北濊水出焉又東北過鄉邑南又東北過窮河邑南又東北過漂榆邑入於海

蕩水

蕩水出河內蕩陰縣西山東

晉改屬魏郡隋開皇六年復置去舊縣東十七里唐復故城貞觀元年改曰湯陰金屬彰德府東北至內黃縣入於黃澤

洹水

洹水出上黨洺氏縣

北魏永安二年爲長平郡治後省入高平北齊天保元年移高平縣於洺氏城唐屬澤州明同

東過隆慮縣北又東北出山過鄴縣南

漢屬魏郡晉建興二年避愍帝諱改曰臨漳東魏天平元年都此以北城隘改作南城曰臨漳縣隋復故名南城仍曰臨漳屬相州宋廢入臨漳在今彰德府口北三十里西屬安陽東屬臨漳

又東過內黃北入於白溝

濁漳水

濁漳水出上黨長子縣西發鳩山

隋開皇九年移寄氏治此寄氏即上黨之倚氏非河東之倚氏十八年復

名唐屬潞州宋屬隆德府戴云今長子縣西五十里

東過其縣南屈從縣東北流又東過壺關縣北

漢屬上黨郡北魏太和十三年移治潁陽岡隋開皇十六年析置上黨縣大業間省入上黨唐武德四年復屬潞州宋屬隆德府今屬潞安府酈注云壺關在屯留東不得先壺關而後屯留也

又東北過屯留縣南

漢屬上黨郡唐屬潞州寰宇記曰武德六年從霍壁移今治按移霍壁之時不知何代豈在酈注前耶

潞縣北

漢屬上黨郡北魏真君二年更刈陵屬襄垣郡隋開皇十六年更名潞城屬上黨郡宋屬隆德府金屬潞州

又東過武安縣南

漢屬定襄郡三國無

又東出山過鄴縣西又東過列人縣南

漢屬廣平國後漢屬鉅鹿郡三國又屬廣平國魏天平初改屬魏郡故城在肥鄉東北二十里

又東北過斥漳縣南

漢屬廣平國後漢屬鉅鹿郡三國復屬廣平國魏屬魏郡北齊省入平恩天保七年移平恩治此隋開皇六年移平恩還舊治因於斥漳城置洺水縣屬洺州元為威州治明為威縣

又東北過曲周縣東

漢屬廣平國晉省隋復元屬廣平路明屬廣平府

又東北過鉅鹿縣東

漢郡治魏景明二年更名平鄉屬南趙郡隋屬邢州宋屬信德府元屬順德路

又北過堂陽縣西

漢屬鉅鹿郡後漢改屬安平郡北魏屬長樂郡隋屬信都郡唐屬冀州宋屬博州皇祐四年以堂陽之新河鎮為縣後俱省入南宮在今武邑西六十里今新河縣屬

冀州

又東北過扶柳縣北

漢屬信都國北魏眞君三年省入堂陽後復北齊省入信都在冀州西三十里

又東北過信都縣西

漢國都後漢安平國都隋初同城又置長樂縣後省唐屬冀州明省入冀州戴氏云案絳瀆之左出者北逕信都城東長蘆水自扶柳城南屈北逕信都城西而漳水則逕扶柳城西不得逕信都城西水經誤故道元正之又東北過下博縣之西

漢屬信都國北魏移治衡水北周建德六年又遷唐屬

深州宋雍熙四年更名靜安元省在深州南二十里
又東北過阜城縣北

漢屬信都國今有屬河間府周遠曰唐曰漢阜謬甚戴云後漢安平國之阜城卽前漢信都國之昌城也故道元明其非渤海之阜成

又東北至昌亭與滹沱河會又東北至樂成陵縣北

樂成漢爲河間國都後漢桓帝追尊河間孝王開爲孝穆王以邑奉山陵更曰樂陵魏復名樂成北魏太和十一年移樂壽故城隋曰樂壽開皇十八年改曰廣城大業十三年又遷唐曰樂壽屬深州元屬河間路明洪武

九年改曰獻縣屬河間府
別出又東北過成平縣南

漢屬渤海郡後漢改屬河間國北魏延昌三年遷治故
景城故城在古景成南二十里景城熙甯六年省入獻
爲鎮景成在獻縣東九十里

又東北過章武縣西

屬渤海郡北魏正光中分章武置章武郡隋并章武縣
於魯城置於章武郡城唐乾符元年改曰乾符宋乾德
二年省入清池在今滄州東北七十里
又東北過平舒縣南東入海

當作東平舒縣非代郡者漢屬渤海郡後漢屬河間郡
晉屬章武郡北魏去東字唐屬景州周顯德六年更名
大城屬霸州

清漳水

清漳水出上黨沾縣西北少山大要谷

戴云今樂平縣西南五十里

南過縣西又從縣南屈東過涉縣西

前漢沙縣屬魏郡後漢因漳水入縣東人民徙涉更名
涉縣晉屬廣平郡北魏天賜省入臨水隋開皇十八年
復屬韓州

屈從縣南東至武安縣南黍窖邑入於濁漳

澹水

澹水出代郡靈邱縣高氏山

後漢省北魏天平二年復今屬大同府

東南過廣昌縣南

漢屬代郡後漢屬中山國晉屬代郡周大象二年遷置

於五龍城屬代郡隋仁壽元年改名飛狐屬易州遼屬

蔚州宋升飛狐軍明復名廣昌

又東南過中山上曲陽縣北

漢屬常山郡後漢改屬中山國隋開皇元年更名恆陽

屬恆山郡唐元和十五年更名曲陽屬定州元屬保定

路明屬真定府今屬定州

恆水從西來注之又東過唐縣南

漢屬中山國隋屬博陵郡宋屬中山府元屬保定路今

屬保定府

又東過安熹縣南

前漢名安險屬中山國章帝改名安熹隋大業初省入

鮮虞故城在定州東三十里

又東過安國縣北

漢屬中山國晉屬博陵齊省入蒲陰陳芳績曰魏劉靈

七

水經釋地 卷三

七

助引兵南至博陵之安國城通鑑引云博陵郡安國縣有安國城北平蒲陰縣亦有安國城故稱博陵以別之隋開皇六年自鄆城移安國於鄭德堡改名義豐屬定州宋太平興國中更名蒲陰爲祁州治明洪武二年省入祁州曲逆後漢改蒲陰齊省入北平

又東過博陵縣南

漢桓帝析蠡吾縣置屬中山國晉屬高陽國治北魏景明元年更名博野屬高陽郡隋屬河間郡唐爲蠡州治周顯德五年改屬定州宋永甯軍治明屬保甯府今屬保定府酈注云漢賢帝本初元年追尊父翼陵曰博陵

因以爲縣又置郡焉繼涵案靈帝建甯四年博陵太守孔彪碑陰博陵領縣有博陵安平安國高陽南深澤是郡之領縣也是後漢中山國之博陵又改爲博陵郡之博陵卽前漢之蠡吾故道元明其非西河郡之博陵西河郡之博陵後漢省

又東北入於易

易水

易水出涿郡故安縣閭鄉西山

三國屬范陽郡北魏曰故安隋開皇十六年於故安西北隅置易縣明省入易州今固安漢方城

東過范陽縣南

漢屬涿郡周移治城北十七里伏圖城一名小范陽隋開皇初改名廼屬上谷郡漢城在易州東南六十里小范陽在易州東南四十五里

又東過容城縣南

漢屬涿州後漢省晉屬范陽國唐天寶間屬易州宋屬易州金屬雄州明屬保定府戴氏云此所言者據酈注爲南易卽雹水注所敘者逕范陽縣北又東逕容城縣北爲中易濡水爲北易

又東過安次縣南

漢屬渤海郡後漢屬廣陽國晉屬燕國宋屬清河郡北魏省入安○唐武德四年移治石梁城貞觀八年又遷魏常道城開元二十三年又遷耿橋行市南屬幽州遼屬析津府宋屬燕山府金屬大興府元中統四年升爲東安州明洪武初改東安縣屬順天府

又東過泉州縣南

秦屬漁陽郡漢末移治三角淀改名雍奴晉曰泉州屬燕國魏眞君七年省入雍奴泉州在武清東南四十里武清今香河

東入於海

巨馬河

巨馬河出代郡廣昌縣涑山東過道縣北

漢屬涿郡三國屬范陽郡北魏移於城南一里隋開皇初曰范陽曰固安曰永陽十八年曰涑水屬上谷郡唐屬涿州遼屬易州

又東南過容城縣北又東過渤海東平舒縣北東入於海

聖水

聖水出上谷東過良鄉縣南

漢屬涿郡三國屬范陽郡北魏屬燕郡唐屬幽州宋屬燕山府金屬大興府元屬大都路明屬順天府

又東過陽鄉縣北

漢屬涿郡後省晉置改曰長鄉屬范陽郡北齊省入涿在順天府西南固安西北二十七里酈注云聖水東南逕陽鄉縣西不逕其北矣

又東過安次縣南東入於海

灤水

灤水出鴈門陰館縣

樓煩鄉漢景帝後三年置靈帝末荒廢唐武德中復改名金城明洪武初省入應州灤近刻訛濕戴氏云說文灤水出鴈門陰館累頭山東入海力追切魏書作灤已

水經釋地 卷三
訛若濕則不得讀力追切據說文改正
東北過代郡桑乾縣南

三國後無

又東過涿鹿縣北

漢屬上谷縣唐更名永興并立新州陳芳績曰唐書不
詳遼爲奉聖州武定軍治明洪武初廢在濁鹿山之野
又東南出山過廣陽薊縣北

後漢幽州刺史治隋屬涿郡唐屬幽州唐建中二年置
幽都與薊分理遼更薊曰析津幽都曰宛平元更曰大
興今順天府治酈注云灑水東北逕薊縣故城南而不

逕其北蓋經誤證矣

又東至漁陽雍奴縣西入笥溝

隋屬涿郡唐屬幽州天寶元年移雍奴於白河之西更
名武清元初屬大興府後屬薊州明屬通州

濕餘水

濕餘水出上谷居庸關東

漢居庸縣云有關北魏屬上谷後無案漢書地理志上
谷郡軍都溫餘水東至路南入沽元史泰定三年溫榆
水溢昌平山水記云溫榆河卽昌平之榆河遼史作溫
渝本水經注之濕餘水以字相似而訛也今考溫與濕

並灑之訛後漢書王霸傳云可從溫水漕溫水乃灑水
唐韋挺運米至盧思臺方知渠閉則久壞不修耳霸所
漕者溫水非溫餘水也李賢注引溫餘釋之疎矣灑水
有說文為顯證而溫餘見漢書濕餘見水經承訛已久
今姑仍之

東流過軍都縣南

漢屬上谷郡後漢屬廣陽郡三國屬燕國北魏移治於
東北二十里仍屬燕郡隋無唐立礬山縣屬新州元省
入永興漢故城在昌平東南礬山在保安舊城南六十
里

又東流過薊縣北又北屈東南至狐奴縣西入於沽河

屬漁陽郡晉後無唐賓義縣永平志云漢狐奴地在順
義東北

沽河

沽河從塞外來南過漁陽狐奴縣北西南與濕餘水合為
潞河又東南至雍奴縣西為笥溝又東南至泉州縣與清
河合東入於海清河者派河尾也

鮑邱水

鮑邱水從塞外來南過漁陽縣東
漢漁陽郡治晉省魏復唐初屬幽州後屬薊州明洪武

初省入薊州

又南過潞縣西

漢屬漁陽郡隋屬涿郡唐貞觀屬幽州遼屬析津府金
爲通州治明省入通州

又南至雍奴縣北屈東入於海

濡水

濡水從塞外來東南過遼西令支縣北

漢末廢魏太平七年省入陽樂陳芳績曰未詳何時遼
僑置安喜民於令支城屬平州金大定七年更名遷安
元屬永平路明屬永定府陳芳績曰永平府志域制經

云孤竹本北荒之總名令支爲炎帝後國而夏封墨胎
於孤竹商初又析之續令支旣皆破於齊燕開遼西郡
則併之令支秦漢因爲縣其孤竹城在境內郡地理風
俗記曰陽樂故燕也遼西郡治凡十四縣三分有二莽
曰令氏則治令支矣曹操自盧龍出塞塹山湮谷五百
餘里其地也魏改郡爲平州治肥如隋改肥如爲盧龍
其西南爲孤竹城唐復置縣以名尋徙不復置矣遼卽
令支廢地遷安喜縣民爲安喜縣金改爲遷安縣而史
爲令支故城何據也今一統志古蹟有令支城屬遼西
郡東漢末廢有遼西城漢爲郡治隋省豈知漢郡治令

支乎又有安喜廢縣在州東北六十里而於今遷安曰
 在府城西北四十里遼因漢令交廢城而金因之至今
 則遼何以有廢縣而漢何以有廢城也且東西之相去
 皆失考矣大抵孤竹在令支東南境當遼西右北平郡
 界無終尤其西南故北州令支為北戎耳相去可五六
 百里而為戎者二三國皆當齊北而於燕為東北也其
 東北以外為遼西北以外為代遼後分為東西無非北
 戎地代後截為上谷無非山戎地而離支又侵之則北
 戎為尤大也故必平山戎而同許男以伐之耳地理志
 離支即令支聲相近支枝交從省也

又東過海陽縣西

漢屬遼西郡齊天保七年省入肥如遼天贊二年置望
 都於漢海陽故城金大定七年更名海山屬中都路元
 省入昌黎在今永定府南三十里酈注云濡水又東南
 至繁縣碣石山于此南入海而不逕海陽縣西也蓋經
 誤證耳

南入於海

大遼水

大遼水出塞外衛白平山東南入塞過遼東襄平縣西
 地理志有牧官齊天保七年省唐有襄平守捉屬柳城

又渤海鐵州郡有東平寨遼太祖以東平寨置襄平縣屬同州治金大定二十九年更名銅山縣屬咸平府

又東南過房縣西

漢屬遼東郡安帝改屬遼東屬國

又東過安市縣西南

漢屬遼東郡渤海為陽池縣屬安市州遼屬鐵州金屬蓋州元省入建安明在蓋州衛東北七十里

入於海

小遼水

又元免高句麗縣有遼山

晉已後無

小遼水所出西南至遼隊縣入於大遼水也

漢屬遼東郡殿板漢書考證引顧炎武救文格論曰候城改屬元菟而遼東復出一候城無慮改屬遼東屬國而遼東復出一無慮必有一焉宜刪者繼涵案地理志遼東郡領縣十八郡國志城十一改屬元菟者三改屬國者三是併省止一縣今遼隊武次居就三縣俱無然公孫淵拒司馬懿於遼隊後漢未併省也

溟水

溟水出樂浪鏤方縣

晉後無拂涅國志東平府柴蒙縣本鏤方地遼仍之屬

東平郡後無

東南過臨沮縣

兩漢志俱作沮水縣屬樂浪郡疑卽酈注所引沮水西

至增地入海爾酈注云地理志沮水西至增地縣入海

又漢興以朝鮮爲遠循遼東故塞至沮水爲界蓋經誤

證也繼涵案經作臨沮疑誤

東入於海

海甯錢保塘
華陽吳祖椿
覆校

水經釋地卷三終

曲阜 孔繼涵 誦孟

濟水

濟水出河東垣縣東王屋山爲沅水

北魏皇興四年析垣縣地置白水長城二縣立邵郡隋

復白水爲垣屬絳州宋更名垣曲戴氏云出今陽城縣

南百里王屋山

又東至溫縣西北爲濟水

漢屬河內郡北魏屬武德郡隋大業十三年移治李城

屬懷州明洪武十年屬懷慶府

又東過其縣北屈從縣東南流過隕城西又南當鞏縣北南入於河與河合流又東過成臯縣北又東過滎陽縣北又東至礫溪南

酈注云濟水又東逕滎陽縣北又東礫石溪水注之水出滎陽城西南李澤東北注於濟世謂之礫石澗即經所謂礫溪矣經云濟出其南非也戴氏東原曰今注重列為經胡朏明引其文乃云上有北礫溪故此為南礫溪石字衍不知注明言礫石溪東北注濟則濟實過其北且辨正經文不當云至礫溪南其無二礫溪固顯然南北二字殆後人誤增

東出過滎澤北

戴氏云滎澤近刻訛滎陽此即注內所謂滎澤在滎陽縣東南者也

又東過陽武縣南

戴氏云案原本及近刻竝訛作縣北考南濟在陽武南其在陽武北者乃北濟觀道元於此下敘南濟所逕而北濟則追敘於後封邱下經本作縣南明矣今改正

又東過封邱縣北

漢屬陳留郡北魏真君九年省入酸棗景明二年復齊省隋開皇十六年復屬東郡唐屬汴州今屬開封府

又東過平邱縣南

漢高帝析封邱置屬陳留郡晉省入封邱宋元嘉八年有後省入長垣在長垣西北九十里一云在封邱東四十里

又東過濟陽縣北

漢屬陳留郡隋屬濟陽郡唐貞觀元年省入宛句

又東過宛句縣南

漢屬濟陰國宋元祐元年更名宛亭屬興仁府金廢興定二年遷東明治於其地元屬大名路後屬開州明洪武初以水患移治雲臺集尋復湮沒遂廢宏治四年復

置東明縣於大單集屬開州漢故城在曹縣境

又東過定陶縣南

秦屬碭郡漢屬濟陰國隋析定陶置濟陰縣唐貞觀元年省入濟陰宋太平興國二年復屬廣濟軍後屬曹州明初屬濟甯府後屬曹州今屬曹州府据酈注北濟自滎澤又東過陽武縣北又東過封邱縣北又東過平邱縣南又東過濟陽縣北又東過宛胸縣北又東過定陶縣北卽鬪駟所謂別濟而南濟則東過陽武縣南又東過封邱縣南又東過濟陽縣南又東過宛胸縣南又東過定陶縣南又屈從縣東北流不顯言經之譌溷耳

又屈從縣東北流又東至乘氏縣西

漢屬濟陰國寰宇記云宋廢其城在今鉅野西南五十
七里魏太和十二年別置於今城金省入濟陰大定末
徙濟陰及曹州治此元曰濟陰明洪武二年徙曹州治
於盤石鎮四年降為曹縣屬濟甯府正統十一年復立
曹州以曹縣屬之

分爲二其一水東南流其一水從縣東北流入鉅野澤
戴云此十八字原本及近刻竝訛入注內接出鉅澤下
今考下云經所謂濟水自乘氏縣兩分東北入於鉅野
也可證此屬經文

又東北過壽張縣西界安民亭南

漢曰壽良屬東郡世祖更名壽張屬東平國唐屬鄆州
金大定七年以水患遷治於竹口鎮十九年復舊治明
洪武初省十四年復遷於王陵店屬東平州

汶水從東北來注之又北過須昌縣西

漢屬東郡後漢東平國移治於此隋開皇十六年更名
宿城別置須昌縣唐太和四年省宿城改名天於須昌宋
屬東平府明省入東平州

又北過穀城縣西又北過臨邑縣東又東北過廬縣北
漢屬泰山郡有長城後漢屬濟北國唐初屬濟州後屬

東平郡宋省入長清在長清南十五里

又東北過臺縣北

漢屬濟南郡三國晉無北齊天保七年改濟南治歷城此廢在濟南府北十三里

又東北過管縣南

漢景帝四年分陽邱立屬濟南郡晉省入東朝陽北魏地屬聊城隋開皇復大業省唐武德二年復屬潭州八年省入平陵在歷城西二十里

又東過梁鄒縣北又東北過臨濟縣南

漢曰狄縣屬千乘安帝永初二年更名臨濟北齊遷治

被陽故城在高苑西二里名如狄故城

又東北過利縣西又東北過甲下邑入於河

酈注云濟水東北過甲下邑南東歷琅槐縣故城北又東北河水枝津注之水經以爲入河非也斯乃河水注濟非濟入河

其一水東南流者過乘氏縣南又東過昌邑縣北

漢屬山陽郡北魏省入金鄉在金鄉西四十里今昌邑縣乃漢北海郡都昌縣

又東過金鄉縣南

後漢置屬山陽郡晉高平國治隋屬濟陰郡唐貞觀十

七年屬兗州周顯德屬濟州元屬濟甯路明屬兗州府

又東過東緡縣北

漢屬山陽郡晉省入金鄉在金鄉東北三十餘里

又東過方與縣北爲菏水

漢屬山陽郡晉屬高平國隋屬彭城郡唐寶應元年更名魚臺元和四年遷治黃臺元屬濟甯路洪武初屬徐州尋屬濟甯府十八年屬兗州府

又東過湖陸縣南

漢曰湖陵屬山陽郡章帝更名湖陸劉宋省入方與東入於泗水又東南過沛縣東北又東南過留縣北

漢屬楚國隋後無在徐州北九十里

又東過彭城縣北睢水從西來注之

酈注云濟水又南逕彭城縣之東北隅不東過也睢水自西注之城北枕水湄濟水又南逕彭城縣故城東不逕其北也蓋經誤證

又東南過徐縣北

漢屬臨淮郡後漢屬下邳國晉屬臨淮魏書云武定七年併梁之東平陽平清河歸義四郡置高平縣爲高平郡治大徐城隋開皇更高平名徐城屬下邳郡唐屬泗州宋建隆二年省廢城在今泗州北五十里

又東至下邳睢陵縣南

漢屬臨淮郡後漢屬下邳國晉末屬濟陰郡陳芳績曰
宋書引太康地志無宋末復立盱眙郡據此則晉宋屬
濟陰者非舊縣矣魏武定五年屬彭城郡北齊遷治唐
武德四年復立四年省入招義金興定二年復立更名
睢甯屬泗州尋屬邳州明屬邳州酈注云濟水與泗水
渾淘東南流至角城同入淮經書睢陵誤耳
入於淮

汶水

汶水出太山萊蕪縣原山

戰國嬴邑宋永初省入牟唐復屬兗州金屬泰安州今
屬泰安府

西南過其縣南

案其原本及近刻並訛作羸蓋後人因注內言汶水又
西南逕羸縣故城南遂憑臆妄改考注云故不得過其
縣南也此句乃舉經文之誤今訂正

又西南過奉高縣北

漢屬泰山郡隋開皇六年更名岱山大業初省入博城
唐武德五年復更名岱貞觀元年省宋開寶五年移乾
封治於漢奉高城大中祥符五年更名奉符屬襲慶府

金屬泰安州明省入泰安州

屈從縣西南流過博縣西北

漢屬泰山郡北魏曰博平隋開皇十七年更名博城屬
兗州唐乾封元年更名乾封宋開寶五年遷於漢奉高
城故城在泰安州東南三十里酈注云汶水南逕博縣
故城東屈從其城南西流不在西北也

又西南過魯國汶陽縣北

晉後無

又西南過蛇邱縣南

古鑄國漢屬太山郡後漢屬濟北國北魏省入平原

又西南過剛縣北

漢屬泰山郡後漢屬濟北國晉更名剛平屬東平國北
魏復名後省入平原

又西南過東平縣南

三國無陳芳績曰疑即鄆城在東平州東七十里繼酒
案郡國志無鹽有鄆城左傳莊三十年齊取鄆是時鄆
縣未省似非一地

又西南過無鹽縣南

古宿國漢屬東平國隋無在東平州東三十里

又西南過壽張縣北又西南至安民亭入於濟

淄水

淄水出泰山萊蕪縣原山東北過臨淄縣東又東過利縣東又東北入於海

巨洋水

巨洋水出朱虛縣泰山

漢屬琅邪郡後漢安帝永初元年改屬北海郡晉屬東莞郡宋屬平昌郡北齊省入琅邪郡北過其縣南又北過臨朐縣東

古駢邑漢屬齊郡晉屬東莞郡劉宋省入昌國案地理志云石膏山洋水所出東北至廣饒入鉅定東萊郡臨

朐下顏師古曰齊郡已有臨朐而東萊又有此縣蓋各以取近為名也斯類不一

又北過劇縣西

地理志北海郡菑川國俱有此縣菑川國下云文帝十八年別為國後并北海劉敞曰不見并北海時至建武乃省菑川入北海耳陳芳績曰劇在北海者疑衍菑川併入北海安有一地二劇耶繼涵案東海有兩平曲一莽曰平端一莽曰端平亦一郡重名但此或合併時誤衍一字耳劇至隋乃省在壽光西南三十里

又東北過壽光縣西

漢屬北海郡後漢屬樂安國宋省隋開皇十六年復唐屬青州

又東北入於海

濰水

濰水出琅邪箕縣濰山

後漢省

東北過東武縣西

漢屬琅邪郡晉屬城陽太康十年改屬東莞郡宋屬平昌郡北魏屬高密郡隋開皇十八年更名諸城唐屬密州明屬青州

又北過平昌縣東

漢屬琅邪後漢屬北海郡魏文帝立平昌郡疑卽此晉屬城陽郡宋屬平昌郡北魏延昌中屬高密陳芳績曰齊郡亦有平昌延興三年屬之或改屬否隋大業三年自牟鄉城移安邱縣於此屬高密郡唐武德六年遷去在安邱南六十里

又北過高密縣西

漢高密國治後漢屬北海郡晉屬高密國隋廢唐武德二年復六年徙去在今高密西南四十里卽城陽城

又北過濰于縣東

漢屬北海郡晉屬陽城郡元康十年屬高密郡北齊省入高密郡

又東北過都昌縣東

漢屬北海郡隋開皇屬濰州大業屬北海郡唐省宋建隆三年復更名昌邑屬北海軍乾德三年屬濰州明屬平度州

又東北入於海

東汶水

東汶水出朱虛縣泰山北過其縣東又北過濇于縣西又東北入於濰

膠水

膠水出黔陬縣膠山

古介國漢屬琅邪郡後漢屬東萊晉初屬城陽郡元康十年屬高密國寰宇記云魏遷於膠水西去故城三十里時人謂之東西二城陳芳績曰地志謂西城為前漢縣東城為後漢縣非也北齊省隋開皇復又分立膠西縣大業初省入膠西唐武德六年省膠西入高密宋元祐復膠西明省入膠州在膠州西七十里明一統志云在高密州西六十里

北過其縣西又北過夷安縣東

古萊夷維邑漢屬高密國安帝屬北海郡宋魏書云晉太康地志屬城陽晉書不載北齊省入高密唐武德六高密治此屬密州元屬膠州

又北過當利縣西

漢屬東萊郡北魏屬長廣郡北齊省入掖唐武德復後省入掖在萊州府西南三十里北入於海

泗水

泗水出魯卞縣北山

漢屬魯國北魏省入鄒隋開皇十六年置名泗水縣屬

魯郡元初省入曲阜尋復屬兖州

西南過魯縣北

漢魯國治隋開皇四年改曰汶陽十六年更曰曲阜屬魯郡宋大中祥符五年更名仙源屬龔慶府金復曰曲阜元屬兖州明正德七年以流賊殘毀遷於闕里

又西過瑕邱縣東

古負瑕地漢屬山陽郡晉省入南平陽隋開皇十三年復屬魯郡宋大觀四年避宣聖諱改名瑕復以字為瑕疵改名嶷陽為龔慶府治明洪武初省十八年復移兖州治在今府西二十五里

水經釋地 卷四
屈從縣東南流澗水從東來注之又南過平陽縣西

酈注卽山陽郡之南平陽縣也案河東郡有平陽太山郡有東平陽故別之晉屬高平國宋去南字北魏仍之隋廢

又南過高平縣西洸水從北西來流注之

漢屬臨淮郡後漢省

又南過方與縣東菏水從西來注之又屈東南過湖陸縣南

案原本及近刻並訛作爲湖陵侯更名湖陵也考後漢書郡國志山陽郡湖陸故湖陵章帝更名劉昭注云前

漢志王莽改曰湖陸章帝復其號又郡國志高平侯國故橐章帝更名劉昭注云前漢志王莽改曰高平章帝復莽此號蓋光武中興凡莽所改卽不行用至章帝改湖陵爲湖陸改橐爲高平偶與莽同以莽不足道故直曰章帝更名耳光武永平二年以橐湖陵益東平國見光武十王列傳注云橐縣一名高平其正文及注兩橐字皆橐之訛是光武時仍前漢之舊稱橐湖陵章帝已後則稱高平湖陸也

涓涓水從東北來流注之又東過沛縣東又東南過彭城縣東北又東南過呂縣南

漢屬楚國寰宇記云宋武帝北征改為壽張縣隋無在徐州東五十里

又東南過下邳縣西

古邾子國漢屬東海郡後漢下邳國治晉志曰葛嶧山在西古嶧陽也隋屬泗州唐為邳州治宋淮陽軍治金邳州治明省入邳州

又東南入於淮

洙水

出泰山蓋縣臨樂山

齊蓋邑晉屬東莞郡復為東安郡治北齊省入新泰山

東省志云開皇十六年復名東安屬琅邪郡後無閭百詩云在今沂州沂水縣西北

西南至卞縣入於泗

沂水

沂水出太山蓋縣艾山南過琅邪臨沂縣東

漢屬東海郡後漢琅邪郡晉省入卽邱北魏武定八年復屬邳郡隋開皇十六年析卽邱置於古邾城大業初自古邾城遷治唐沂州治明洪武元年省入沂州古邾城在沂州口三十里

又南過開陽縣東

水經釋地卷四

古邳國漢屬東海郡後漢移琅邪郡治此宋屬彭城郡
後無

又東過襄賁縣東

漢屬東海郡北魏屬海西郡東魏改名海安陳芳績曰
案寰宇記曰漣水本漢朐猶地魏曰海安縣晉爲宿預
之境宋太始五年於此置東海郡仍於此北三十里東
海王城別置襄賁縣以屬之南界又置冀州寄理於此
以爲邊鎮防振之所後改東海安郡仍分置海西臨海
二縣以隸之隋開皇三年廢郡以縣爲海州五年改襄
賁爲漣水考宋書無之唐武德四年爲漣州治宋初漣

水軍治後爲安東州治元省入州明洪武二年爲安東
縣屬淮安府

屈從縣南西又屈南過郟縣西

漢東海郡治劉宋南徐州治隋屬下邳郡唐省臨沂元
至正間復名郟城屬沂州

又南過良成縣西

漢屬東海郡後漢屬下邳國隋開皇十二年改爲爲城
唐省廢城在今邳州北九十里

又南過下邳縣西南入於泗

沐水

沐水出琅邪東莞縣西北大弁山

寰宇記云卽春秋時莒魯所爭之鄆邑在東平郡者爲西鄆魯昭公所居在此爲東鄆晉屬東莞郡北魏太和中析置新泰屬南青州東安郡隋東莞屬高密郡開皇十六年改新泰爲沂水屬琅邪郡陳氏芳績曰寰宇記謂今沂水卽漢東莞然魏時新泰東莞並有隋時沂水東莞並有未審何時遷治併省也金屬莒州

東南過其縣東又東南過莒縣東

漢城陽國治後漢并屬琅邪國宋屬東平郡唐武德五年置莒州治貞觀八年并屬密州金莒州治明省入莒

州

又南過陽都縣東入於沂

漢屬城陽國後漢并屬琅邪晉後無

水經釋地卷四終

海甯錢保塘
華陽吳祖椿覆校

